

განმარტებითი ბარათი

„რეკონსტრუქციის საკრედიტო ბანკსა (KfW) და საქართველოს შორის 2019 წლის 7 ოქტომბერს ხელმოწერილი სასესხო შეთანხმების (პოლიტიკაზე დაფუძნებული სესხი II)“ შესახებ

2018 წლის 14 მაისს საქართველოს მთავრობას, წარმოდგენილი საქართველოს ფინანსთა სამინისტროს მიერ, რეკონსტრუქციის საკრედიტო ბანკსა (KfW) და საფრანგეთის განვითარების სააგენტოს (AFD) შორის ხელი მოეწერა განზრახულობათა დეკლარაციას „გერმანიის და საფრანგეთის ფინანსური თანამშრომლობა საქართველოსთან“. აღნიშნული დეკლარაცია გულისხმობს, რომ საფრანგეთის განვითარების სააგენტო (AFD) და რეკონსტრუქციის საკრედიტო ბანკი (KfW) მზად არიან მხარი დაუჭირონ საქართველოს მთავრობის მიერ ენერგეტიკის სექტორში დაგეგმილ რეფორმებს (AFD - 60 მლნ ევრო და KfW - 60 მლნ ევრო). აღნიშნული თანხები წარმოადგენს ბიუჯეტის მხარდამჭერ სესხს, რომელიც პირდაპირ მიიმართება ბიუჯეტში. აღსანიშნავია, რომ AFD და KfW მზად არიან ითანამშრომლონ საქართველოსთან ენერგეტიკის სფეროში 4 წლიანი (2018-2021) პროგრამის ფარგლებში. 2018 წელს პროგრამის ფარგლებში სახელმწიფო ბიუჯეტში ჩაირიცხა: AFD 25 მილიონი ევრო და KfW - 49 მილიონი ევრო სესხების სახით.

აღნიშნულის უზრუნველსაყოფად და საქართველოს მთავრობის 2019 წლის 4 ოქტომბრის #2122 განკარგულების შესაბამისად, რეკონსტრუქციის საკრედიტო ბანკსა (KfW) და საქართველოს შორის 2019 წლის 7 ოქტომბერს ხელი მოეწერა სასესხო შეთანხმებას (პოლიტიკაზე დაფუძნებული სესხი II).

KfW-ს სესხის ფინანსური პირობებია:

- სესხის მოცულობა: 60 მილიონი ევრო;
- სესხის ხანგრძლივობა: 15 წელი (მათ შორის შეღავათიანი პერიოდი 5 წელი);
- საპროცენტო განაკვეთი: 6 თვიან EURIBOR-ზე დაფუძნებული ცვლადი საპროცენტო განაკვეთი (EURIBOR+მარჟა), 25 სექტემბრის მდგომარეობით EURIBOR არის -0.373%, ხოლო მარჟა შეადგენს 0.75%-ს. მარჟა დაფიქსირდება ხელშეკრულების ხელმოწერის დღეს;
- ადმინისტრირების გადასახდელი: 1% (ერთჯერადი გადასახდელი, ერიცხება სესხის მთლიან მოცულობას, სესხის თანხიდან გადახდა არ ხდება);
- ვალდებულების გადასახდელი: წლიური 0.25% (ერიცხება სესხის აუთვისებელ ნაწილს).

ამასთან, პროექტისთვის მიმდინარე წლის 20 სექტემბერს KfW-სა და საქართველოს შორის ხელი მოეწერა დაფინანსების ხელშეკრულებას, რომლის ფარგლებშიც დონორი საკონსულტაციო მომსახურებისთვის გამოყოფს გრანტს ტექნიკური დახმარების სახით 8,440,000 ევროს ოდენობით. კონსულტანტის მიერ ძირითადად ხორციელდება ენერგეტიკის სექტორში პოლიტიკისა და კანონმდებლობის ცვლილებების შედეგების შეფასება, როგორც ენერგოეფექტურობის, ასევე ენერგეტიკის ბაზრის განვითარების ღონისძიებების კუთხით.